

**სსიპ - სამცხე-ჯავახეთის სახელმწიფო უნივერსიტეტის
საერთაშორისო გაცვლით და მობილობის პროგრამებში
მონაწილეობისათვის სტუდენტთა**

შერჩევის წესი

მუხლი 1. ზოგადი დებულებები და რეგულირების სფერო

1.სსიპ - სამცხე-ჯავახეთის სახელმწიფო უნივერსიტეტის საერთაშორისო გაცვლით და მობილობის პროგრამებში მონაწილეობისათვის სტუდენტთა შერჩევის წესის (შემდგომში - „წესი“) მიზანია სსიპ - სამცხე-ჯავახეთის სახელმწიფო უნივერსიტეტის (შემდგომში - „უნივერსიტეტი“) სტუდენტების საერთაშორისო გაცვლით და მობილობის პროგრამებში მონაწილეობის ხელშეწყობა.

2.წინამდებარე წესი არეგულირებს უნივერსიტეტის საერთაშორისო გაცვლით და მობილობის პროგრამებში მონაწილეობის მიზნით უნივერსიტეტის სტუდენტების შერჩევის პროცედურულ საკითხებს.

მუხლი 2. საერთაშორისო გაცვლითი და მობილობის პროგრამების საფუძვლები

უნივერსიტეტის საერთაშორისო გაცვლითი და მობილობის პროგრამების საფუძველი შეიძლება იყოს პარტნიორ უცხოულ უმაღლეს საგანმანათლებლო დაწესებულებასთან დადებული ორმხრივი წერილობითი დოკუმენტი (მემორანდუმი, ხელშეკრულება და სხვ.), უნივერსიტეტის მიერ მიღებული საერთაშორისო პროექტი ან სხვა საერთაშორისო პროექტი, პროგრამა, რომელშიც უნივერსიტეტი მონაწილეობს.

მუხლი 3. უნივერსიტეტის მიზნები საერთაშორისო გაცვლითი და მობილობის პროგრამების ფარგლებში

გარდა უმაღლესი განათლებისა და სამეცნიერო-კვლევით სფეროში საერთაშორისო გამოცდილების გაზიარებისა და საერთაშორისო სივრცეში დამკვიდრებისა, უნივერსიტეტის მიზანია, სტუდენტების ჩართვა საერთაშორისო გაცვლით და მობილობის პროგრამებში, შესაბამისი უნარებისა და გამოცდილების შეძენა, უკეთესი კარიერული მომავლის დაგეგმვა, რეალიზება, მიღებული ცოდნისა და გამოცდილების უნივერსიტეტისათვის გაზიარება.

მუხლი 4. გაცვლით და მობილობის პროგრამებში მონაწილეობის მიზნით უნივერსიტეტის სტუდენტთა შერჩევის პროცედურა

1. გაცვლით პროგრამებში მონაწილეობის მიზნით უნივერსიტეტი აცხადებს შესაბამის ინფორმაციას აპლიკანტთა რეგისტრაციის თაობაზე. განცხადებაში აღინიშნება უცხოეთის რომელ უმაღლეს საგანმანათლებლო დაწესებულებაში ხორციელდება კონკრეტული გაცვლითი ან მობილობის პროგრამა/პროგრამები და სწავლების რომელ საფეხურზე (რომელი სემესტრის სტუდენტებისთვისაა შესაძლებელი გაცვლით ან მობილობის პროგრამაში მონაწილეობა), რა ვადებს მოიცავს გაცვლითი ან მობილობის პროგრამა, დაინტერესებული პირების მონაწილეობისათვის განსაზღვრული წინაპირობები, შერჩევის პროცედურის ეტაპები, შესაბამისი რეგისტრაციისა და დოკუმენტაციის წარმოდგენის ვადები, ფორმები და სხვა აუცილებელი ინფორმაცია (დეტალები).

2. რეგისტრაცია დაინტერესებულმა სტუდენტმა უნდა გაიაროს უნივერსიტეტის გამოქვეყნებულ განცხადებაში მითითებულ მისამართზე.

3. ამ მუხლის მე-3 პუნქტით გათვალისწინებული რეგისტრაციის წინაპირობებია:

ა) სტუდენტის აქტიური სტატუსი;

ბ) სტუდენტის GPA არ უნდა იყოს 2.5-ზე ნაკლები;

გ) პირის საგანმანათლებლო პროფილი (ფაკულტეტი, პროგრამული მიმართულება, საგანმანათლებლო პროგრამა) უნდა იყოს გაცვლითი პროგრამით გათვალისწინებული ვაკანსიის პროფილის შესაბამისი;

დ) პარტნიორი უნივერსიტეტის მიერ მოთხოვნილი ფორმის შესაბამისად სრულფასოვნად შევსებული სასწავლო ხელშეკრულება;

ე) კონკრეტული გაცვლითი პროგრამის/პროექტის შესაბამისად განსაზღვრული დამატებითი მოთხოვნები არსებობის შემთხვევაში.

5. ამ მუხლის მე-3 პუნქტით გათვალისწინებული გაცვლით პროგრამაში მონაწილე სტუდენტების მიმღები უცხოური მხარის პორტალზე რეგისტრაციისათვის აუცილებელი წინაპირობები და წარსადგენი დოკუმენტაციის ნუსხა ქვეყნდება ყოველი ცალკეული შემთხვევისათვის ინდივიდუალურად.

6. გარდა წინამდებარე წესით გათვალისწინებული წინაპირობებისა, დამატებითი წინაპირობების არსებობის შემთხვევაში, ისინი გამოქვეყნდება საჯაროდ, ამ მუხლის პირველი პუნქტით გათვალისწინებული განცხადების ფარგლებში.

7. გაცვლით პროგრამაში მონაწილეობის (რეგისტრაციის წინაპირობების დაკმაყოფილების) მიზნით შესავსებ სასწავლო ხელშეკრულებას ხელს აწერენ: სტუდენტი, ფაკულტეტის წარმომადგენელი (დეკანი, ხარისხის სამსახურის უფროსი) და მასპინძელი (მიმღებ) უმაღლესი საგანმანათლებლო დაწესებულების (რომელშიც უნდა განხორციელდეს გაცვლითი პროგრამის საფუძველზე სტუდენტის სწავლება) წარმომადგენელი.

8. გარდა წინამდებარე წესში მოცემული პირობებისა, სასწავლო ხელშეკრულებაზე სავალდებულოა სტუდენტის და უნივერსიტეტის შესაბამისი ფაკულტეტის პასუხისმგებელი პირის ხელმოწერა, რაც ადასტურებს ფაკულტეტის მზადყოფნას, განიხილოს იმ საგანმანათლებლო დისციპლინების გავლის შედეგად მიღებული კრედიტების აღიარება, რომლებიც სტუდენტს უფიქსირდება სასწავლო ბარათში მისი გაცვლითი პროგრამის ფარგლებში მობილობიდან დაბრუნებისას.

ფაკულტეტის წარმომადგენელი ხელმძღვანელობს შემდეგით:

ა) სტუდენტს სასწავლო ხელშეკრულებაში მითითებული საგანმანათლებლო დისციპლინები არ უნდა ჰქონდეს გავლილი უნივერსიტეტში და არც გაცვლით პროგრამაში მონაწილეობისას არ უნდა გადიოდეს მათ;

ბ) სტუდენტის მიერ სასწავლო ხელშეკრულებაში მითითებული საგანმანათლებლო დისციპლინები თავსებადი/ შესაბამისი უნდა იყოს იმ საგანმანათლებლო პროგრამასთან, რომელზეც იგი ირიცხება უნივერსიტეტში და ხელს უწყობს შესაბამისი კურიკულუმით განსაზღვრული სწავლის შედეგების მიღწევას.

9. სასწავლო ხელშეკრულების შევსებისას აუცილებელია გათვალისწინებული იქნას, რომ მასში არ არის რეკომენდებული ისეთი საგანმანათლებლო დისციპლინების მითითება, რომელიც სტუდენტის მიერ მასპინძელი უმაღლესი საგანმანათლებლო დაწესებულებიდან დაბრუნების შემდეგ გამოიწვევს სტუდენტის სწავლების პერიოდის გახანგრძლივებას, მაგრამ თუ აღნიშნული საჭიროება გარდაუვალი იქნება, ამის შესახებ სტუდენტს უნდა განემარტოს

დეტალურად ფაკულტეტის წარმომადგენლის მიერ ამ უკანასკნელის მხრიდან სასწავლო ხელშეკრულებაზე ხელმოწერამდე.

10. წინამდებარე მუხლის მე-4 პუნქტით გათვალისწინებული წინაპირობების დაკმაყოფილებისა და შესაბამისი რეგისტრაციის მიზნებისათვის სტუდენტმა უნდა წარმოადგინოს:

ა) პირადობის დამადასტურებელი დოკუმენტის - პასპორტის/პირადობის მოწობის ასლი (სკანირებული pdf ვერსია);

ბ) CV-ს (უცხოურ ენაზე (სკანირებული pdf ვერსია);

გ) ცნობა სტუდენტის სტატუსის შესახებ (უცხოურ ენაზე - ნოტარიულად დადასტურებული(სკანირებული pdf ვერსია);

დ) სტუდენტის მიმდინარე შეფასებების ამონაწერი მის მიერ გავლილი საგანმანათლებლო დისციპლინების მიხედვით, GPA-ის მითითებით (უცხოურ ენაზე (სკანირებული pdf ვერსია);

ე) უცხო ენის ცოდნის დამადასტურებელი დოკუმენტი (სკანირებული pdf ვერსია);

ზ) დადგენილი წესით შევსებული და დამოწმებული სასწავლო ხელშეკრულება;

თ) საროკომენდაციო წერილი (სასურველია).

11. გარდა წინამდებარე წესით გათვალისწინებული, რეგისტრაციის მიზნით წარმოსადგენი დოკუმენტაციისა, დამატებითი წინაპირობების არსებობის შემთხვევაში, ისინი გამოქვეყნდება საჯაროდ, ამ მუხლის პირველი პუნქტით გათვალისწინებული განცხადების ფარგლებში.

12. გაცვლით და მობილობის პროგრამაში მონაწილე სტუდენტთა შერჩევის მიზნით (რეგისტრაციის დასრულებისა და ამ წესით გათვალისწინებული ყველა მოთხოვნის დაკმაყოფილების შემდგომ), იქმნება შესაბამისი კომისია, რომელიც შედგება არანაკლებ 3 პირისაგან (საზღვარგარეთთან ურთიერთობისა და ფაკულტეტის წარმომადგენლების ჩართულობით).

13. კომისია ხელმზღვანელობს შემდეგი კრიტერიუმებით: GPA, გასაუბრების შედეგები (გასაუბრება იმართება უცხოურ ენაზე და ფასდება წინასწარ განსაზღვრული კრიტერიუმების შესაბამისად (დანართი 1)).

14. კონკრეტულ გამოცხადებულ გაცვლით პროგრამაში/პროგრამებში მონაწილე სტუდენტების შესარჩევი პროცესის დასრულების შემდგომ, ამ შერჩევის პროცესში მონაწილე სტუდენტების შეფასებების არსებობის საფუძველზე, უნივერსიტეტის საზღვარგარეთთან ურთიერთობის მიმართულების თანამშრომელი ადგენს რეიტინგულ სიას. რეიტინგული სია მოიცავს შერჩევაში მონაწილე ყველა სტუდენტს.

15. კომისიის მიერ მიღებული გადაწყვეტილების საფუძველზე შერჩეულ კონკრეტულ სტუდენტთა შესახებ ინფორმაცია ეგზავნება შესაბამის მიმღებ უმაღლეს საგანმანათლებლო დაწესებულებას. ამავდროულად, შერჩევის პროცესის შედეგად მიღებული შედეგები ეცნობება შერჩევის პროცესში მონაწილე ყველა სტუდენტს ინდივიდუალურად.

15. პროცესი სრულდება მასპინძელი უმაღლესი საგანმანათლებლო დაწესებულების მიერ შესაბამისი სტუდენტისთვის მიწვევის წერილის გამოგზავნითა და ამ სტუდენტის სასწავლო ხელშეკრულებაზე ხელმოწერით.

16. შერჩევის პროცესში მონაწილეობას ვერ მიიღებს სტუდენტი, რომელსაც მობილობის იმავე პერიოდში მოპოვებული აქვს სხვა გაცვლით პროგრამაში მონაწილეობის უფლება.

მუხლი 5. პროცესში მონაწილე სუბიექტების პასუხისმგებლობის სფერო

ამ წესით დადგენილი პროცედურების მიმდინარეობისას მასში მონაწილე სუბიექტებს გააჩნიათ პასუხისმგებლობის სფეროები. უნივერსიტეტი, მისი სტრუქტურული ერთეულები და უფლებამოსილი პირები თავისი კომპეტენციის ფარგლებში პასუხისმგებელი არიან წინამდებარე წესის მოთხოვნათა დაცვაზე, კერძოდ:

ა) რეგისტრაციის ეტაპზე:

ა.ა) დადგენილი ვადების დაცვა;

ა.ბ) შესაბამისი დოკუმენტების შექმნა;

ა.გ) სასწავლო ხელშეკრულების შევსება;

ა.დ) ყველა საჭირო დოკუმენტზე სათანადო ხელმოწერის მოპოვება;

ა.ე) სარეგისტრაციო პორტალზე პროფილის შექმნა და განაცხადის გაკეთება;

ა.ვ) პოტენციურ რეკომენდატორთან დროული კომუნიკაცია;

ა.ზ) გასაუბრებაზე დასწრება;

ა.თ) საკუთარი შესაბამისი ელექტრონული ფოსტის ხშირი შემოწმება;

ა.ი) უნივერსიტეტის ვებგვერდის ხშირი შემოწმება;

ა.კ) მის მიერ წარმოდგენილი დოკუმენტაციის და ინფორმაციის ნამდვილობა.

ბ) გაცვლით პროგრამაში მონაწილე სტუდენტის შერჩევისა და მისი მასპინძელი უმაღლესი საგანმანათლებლო დაწესებულების მიერ დადასტურების შემთხვევაში:

ბ.ა) მასპინძელი უმაღლესი საგანმანათლებლო დაწესებულების მიერ შემოთავაზებული პირობების გაცნობა და წესების ზედმიწევნით დაცვა;

ბ.ბ) სავიზო პროცედურის დროულად დაწყება და ვიზის მოპოვება;

ბ.გ) მასპინძელი უმაღლესი საგანმანათლებლო დაწესებულების მიერ მიღებულ შეტყობინებებზე რეაგირება;

ბ.დ) მასპინძელი უმაღლესი საგანმანათლებლო დაწესებულების მიერ დადგენილ ვადაში ჩასვლა და დარჩენა მობილობის სრული პერიოდის დასრულებამდე;

ბ.ე) ბაკალავრიატის და მაგისტრატურის შემთხვევაში, მასპინძელ უმაღლეს საგანმანათლებლო დაწესებულებაში საგანმანათლებლო დისციპლინების გავლა (კრედიტების ჯამური ოდენობა სემესტრში პროგრამის მოთხოვნის შესაბამისად) და გამოცდების წარმატებით ჩაბარება;

ბ.ვ) დოქტორანტურის შემთხვევაში, მასპინძელ უმაღლეს საგანმანათლებლო დაწესებულებაში წინასწარ შეთანხმებული სასწავლო და კვლევითი საქმიანობის წარმოება;

ბ.ზ) მასპინძელ უმაღლეს საგანმანათლებლო დაწესებულებაში ყოფნისას სასწავლო ხელშეკრულებაში მითითებული საგნების შეცვლის შემთხვევაში, უნივერსიტეტის შესაბამისი ფაკულტეტის წარმომადგენელთან კომუნიკაცია და სასწავლო ხელშეკრულებაში ცვლილების გაფორმება წერილობით, ყველა საჭირო ხელმოწერის მოპოვება;

ბ.თ) მობილობის სასწავლო პერიოდის დასრულებისთანავე საქართველოში დაბრუნება და კრედიტების აღიარების პროცესის დაწყება უნივერსიტეტში.

მუხლი 6 . დასკვნითი დებულებები

წინამდებარე წესის საფუძველზე უნივერსიტეტის უფლებამოსილ პირთა მიერ მიღებული გადაწყვეტილებები (მათ შორის, შერჩევის პროცედურის მიმდინარეობისას მიღებული შუალედური და საბოლოო გადაწყვეტილებები) შესაძლოა გასაჩივრდეს საქართველოს სასამართლოში, კანონმდებლობით დადგენილი წესით.

დანართი 1:

გასაუბრების შეფასების კრიტერიუმებია:

კომუნიკაციის უნარი: 0 – 10 ქულა

სტუდენტის მიერ მოტივაციის დასაბუთება: 0 - 10 ქულა

პროგრამაში/პროექტში მონაწილეობისთვის მზაობა: 0 – 10 ქულა